

Ujian Covid-19 percuma tanpa mengira kewarganegaraan

Malaysiakini

23 Mac 2020

Hariz Mohd

Kementerian Kesihatan Malaysia (KKM) menjelaskan bahawa semua ujian untuk pengesanan Covid-19 adalah percuma, termasuk untuk warga asing.

Menurut Ketua Pengarah Kesihatan Noor Hisham Abdullah, bayaran hanya dikenakan kepada ujian yang tidak berkaitan dengan Covid.

"Jika warga asing datang ke klinik atau hospital KKM untuk pemeriksaan penyakit bukan Covid-19, mereka akan dikenakan bayaran mengikut yuran yang telah ditetapkan oleh kerajaan.

"Bagaimanapun, untuk Covid-19, tidak ada bayaran yang dikenakan seperti dinyatakan pekeliling kementerian pada 29 Jan.

"Tidak kira sama ada warga asing kaya atau miskin, mereka tidak akan dikenakan bayaran," katanya semasa sidang akhbar mengenai Covid-19 di

Putrajaya hari ini.

Beliau diminta menjelaskan perkara itu, selepas Perdana Menteri Muhyiddin Yassin pada hari ini memberitahu sidang akhbar bahawa bayaran akan dikenakan kepada warga asing yang tampil untuk mendapatkan ujian Covid-19.

Muhyiddin, selepas mempengerusikan mesyuarat Majlis Tindakan Ekonomi hari ini, ditanya pada sidang akhbar sama ada warga asing yang membuat ujian Covid-19 di hospital awam dikenakan bayaran.

"Ya, memang ada kos. Walaupun mereka pergi ke hospital (awam), sebahagian kos itu ditanggung (kerajaan), untuk warganegara sahaja.

"Kalau mereka itu warga asing, mereka terpaksa bayar. Tapi penting mereka buat begitu untuk menjamin mereka tidak menghidapi penyakit itu.

"Lebih baik tampil, kalau tak dirawat akan timbul musibah," kata Muhyiddin.

Bagaimanapun, portal kesihatan CodeBlue melaporkan bahawa pekeling KKM bertarikh 29 Jan mengecualikan bayaran pendaftaran, pemeriksaan, rawatan dan kemasukan ke hospital untuk warga asing yang mempunyai kontak rapat dengan pesakit Covid-19.

Sebelum ini, terdapat pihak yang menimbulkan kebimbangan bahawa pekerja asing, terutamanya yang tanpa dokumentasi, akan takut tampil membuat ujian.

Copyright © 1999-2012 Mkini Dotcom Sdn. Bhd

Source: <https://www.malaysiakini.com/news/516362>